

全唐詩話卷之五

于武陵

孤雲詩云南北各萬里有雲心更開
困風離海上
伴月到人間洛浦少高樹長安無舊山
徘徊不可
住漠漠又東還

客中云楚人歌竹枝遊子淚沾衣異國久為客寒
宵頻夢歸一封書未返千樹葉皆飛南渡洞庭水
更應消息稀

全唐詩話

卷五

汲古閣

李頰

過四皓廟云東西南北人高跡自相親天下已歸
漢山中猶避秦龍樓曾作客鶴氅不為臣獨有千
年後青青廟木春

劉魯風

魯風江南投謁所知頗為典客所阻因賦一絕曰
萬卷書生劉魯風烟波萬里謁文翁無錢乞與韓
知客名紙毛生不肯通

自正元後唐文甚振以文學科第爲一時之榮及其弊也士子豪氣罵吻遊諸侯門諸侯望而畏之如劉魯風姚崑傑柳棠胡曾之徒其文皆不足取余故載之者以見當時諸侯爭取譽於文士此蓋外重內輕之牙蘖如李益者一時文宗猶曰感恩知有地不上望京樓其後如李山甫輩以一名一第之失至挾方鎮劫宰輔則又有甚焉者矣一篇一韻初若虛文而治亂之萌係焉余以是知其不可忽也

全唐詩話

卷五
二

汲古閣

褚載

雲詩云盡日看雲首不迴無心都大似無才可憐
光彩一片玉萬里青天何處來

賀趙觀文重試及第云一枝仙桂兩回春始覺文章可致身已把色絲要上第又將綵筆冠羣倫龍泉再淬方知利火浣重燒轉更新今日街頭看御榜大能榮耀苦心人

陸威爲郎官載以文投獻數字犯其家諱威因矍然載尋以牋致謝曰曹興之圖畫雖精終慙誤筆殷浩之矜持太過翻達空函

載字厚之登乾寧進士第

汪遵

遵幼爲吏許棠應二十餘舉遵猶在胥徒善爲絕句詩而深晦縝密一旦辭役就貢會棠送客至灞澹間遇遵於途訊曰何事至京遵曰就貢棠怒曰

全唐詩話

卷五
三

汲古閣

小吏無禮後遵成名五年棠始登第

秦築長城比鐵牢蕃戎不敢過臨洮雖然萬里連雲際爭及堯階三尺高遵長城詩也得名於時

遵宣城人登咸通七年進士第許棠其鄉人也平泉花木好高樹嵩少縱橫滿目前惆悵人間不平事今朝身在海南邊遵題李太尉平泉莊詩也

盧渥

渥字子章軒冕之盛近代無比伯仲四人咸居顯

列乾符初母憂服闋渥自前中書舍人拜陝府觀察使弟沼前長安令除給事中弟沅自前集賢校理除左拾遺弟沼自畿尉遷監察御史詔書疊至士族榮之及赴任陝郊自居守分司朝臣已下牙設祖筵洛城爲之一空都人聳觀亘數十里渥題嘉祥驛詩曰交親榮餞洛城空秉鉞戎裝上將同星使自天丹詔下雕鞍照地數程中馬嘶靜谷聲偏響旆映晴山色更紅別後定知人易老滿街棠樹有遺風

全唐詩話

卷五
四

汲古閣

渥在舉場甚有時稱曾於潼水逆旅遇宣宗微行意其貴人斂身避之帝呼與相見乃自稱進士盧渥帝請詩卷袖之而去他日對宰臣語及渥令主司擢第宰臣問渥與主上有何階緣渥具陳其由時亦不以爲忝

滕倪

滕倪苦心爲新詩嘉聲早播遠之吉州謁宗人太

守郎中邁邁每吟其句云白髮不能容相國也同
閑客滿頭生又題鷺鷥障子云映水有深意見人
無懼心邁曰魏文惜陳思之學潘岳褒正叔之文
貴集一家之盛如此

倪通秋試捧笈告遊留詩爲別悵然曰是必不祥
倪至秋卒於商於館舍聞者莫不傷焉倪詩曰秋
初江上別旌旗故國無家淚欲垂千里未知投足
處前程便是聽猿時誤攻文字身空老却返樵漁
全唐詩話

卷五
五

汲古閣

費冠卿

冠卿字子軍池州人久居京師感懷詩云孰獨不
爲苦求名始辛酸上國無交親請謁多少難九月
風到面羞汗成冰片求名俟公道名與公道遠力
盡得一名他喜我且輕家書十年絕歸去知誰榮
馬嘶渭橋柳特地起愁聲登元和二年第母卒旣
葬而歸歎曰干祿養親耳得祿而親喪何以祿爲

遂隱池州九華山長慶中殿院李行修舉其孝節
拜右拾遺制曰前進士費冠卿嘗預計偕以文中
第祿不及於榮養恨每積於永懷遂乃屏身丘園
絕跡仕進守其志性十有五年峻節無用清飈自
遠夫旌孝行舉逸人所以厚風俗而敦名教也宜
承高獎以儆薄夫擢參近侍之榮載佇移忠之效
冠卿竟不應命杜荀鶴有詩弔其墓曰凡弔先生
者多傷荆棘間不知三尺墓高却九華山天地有
何外子孫無亦間當時若徵起未必得身還冠卿
以拾遺召不起賦詩云君親同是先王道何如骨
肉一處老也知臣子合佐時自古榮華誰可保

李廓

廓李程之子也登元和進士第大中中拜武寧節
度使不能治軍補闕鄭魯言新麥未登徐必亂旣
而軍亂果逐廓按舊史廓有詩名大中末累官至
潁州刺史再爲觀察使子晝亦登進士第

廓落第詩云榜前潛拭淚衆裏自嫌身氣味如中
酒情懷似別人暖風張樂席晴日看花塵盡是添
愁客深居乞過春

薛能

能字大拙汾州人會昌六年進士大中八年書判
入等補整屋尉辟太原陝虢河陽從事李福鎮滑
州表觀察判官歷侍御史都官刑部員外郎福徙
西川取爲節度副使咸通中攝嘉州刺史歸朝遷

全唐詩話

卷五
七

汲古閣

主客度支刑部郎中俄刺同州京兆尹溫璋貶命
權知尹事出領感化節度入授工書復節度徐州
徙忠武廣明元年徐兵赴澉水經許能以前帥徐
軍吏懷恩館之州內許軍懼徐人見襲大將周岌
因衆怒遂能自稱畱後能全家遇害

獻僕射相公云清如水玉重如山百辟嚴趨禮絕
攀強虜外聞應破膽平人相見盡開顏朝廷有道
青春好門館無私白日閒致却垂衣更何事幾多

詩句詠關關

能題集後曰詩源何代失澄清處處狂波汗後生
常感道孤吟有淚却緣風壞語無情難甘惡少欺
韓信枉被諸侯殺禰衡縱到緱山也無益四方聯
絡盡蛙聲青春背我堂堂去白髮催人故故生此
能詩也然無子美大雅之度

秋夜旅舍寓懷云庭鎖荒蕪獨夜吟西風吹動故
人心三秋水落半年客滿地月明何處砧漁唱亂

全唐詩話

卷五

汲古閣

沿汀鷺合雁聲寒咽隴雲深平生只有松堪對露
浥霜欺不受侵

曹鄴

鄴字業之大中進士也唐末以祠部郎中知洋州
老圃堂詩云邵平瓜地接吾廬穀雨乾時手自鋤
昨日春風欺不在就床吹落讀殘書

聶夷中

夷中有公子行云種花滿西園花發青樓道花下

一禾生去之爲惡草又詠田家詩云父耕原上田
子劬山下荒六月禾未秀官家已修倉又云二月
賣新絲五月糶新穀醫得眼前瘡剗却心頭肉我
願君王心化作光明燭不照綺羅筵只照逃亡屋
所謂言近意遠合三百篇之旨也咸通十二年高
湜知舉榜內孤寒者夷中公乘億許棠夷中尤貧
苦精古詩

夷中字坦之咸通中爲華陰尉

全唐詩話

卷五

汲古閣

張林

林擢進士第官至御史爲詩小巧多採景於園林
亭沼云菱葉乍翻人採後芰荷初沒舸行時亦佳
句也林言毀佛寺時御史有蘇監察者檢天下廢
寺見銀佛一尺以下者多袖而歸時號蘇捏佛溫
庭筠遽曰好對蜜陀僧

崔塗

春夕旅懷云水流花謝兩無情送盡東風過楚城

蝴蝶夢中家萬里杜鵑枝上月三更故園書動經
年別華髮春惟兩鬢生自是不歸歸便得五湖烟
景有誰爭

蜀城春云天涯憔悴身一望一霑巾在處有芳草
滿城無故人懷才皆得路失計自傷春清鏡不堪
照鬢毛愁更新

塗字禮山光啓進士也

章碣

全唐詩話

卷五

汲古閣

焚書坑詩云竹帛烟銷帝業虛關河空鎖祖龍居
坑灰未冷山東亂劉項原來不讀書

碣孝標之子登乾符進士第

方干

越州使院竹云莫見凌雲飄粉籜須知礙石作盤
根細看枝上蟬吟處猶是笋時虫食痕月送綠陰
斜上砌露凝寒色溼遮門列仙終日逍遙地鳥雀
潛來不敢喧

世人如不容吾自縱天慵落葉憑風掃香粳倩水
春花朝連郭霧雪夜隔湖鐘身在能無事頭宜白
此峰干爲詩如鶴盤遠勢投孤嶼蟬曳殘聲過別
枝齊梁以來未有之句也又貽天目中峰客有枯
井夜聞隣果落廢巢寒見別禽來之句

衛準

莫言閒話是閒話往往事從閒話來又何必剃頭
爲弟子無家便是出家人

全唐詩話

卷五
十一

汲古閣

準大曆五年登進士第

司空圖

愚幼嘗自負既久而愈覺缺然得於春早則有草
嫩侵沙長水輕著雨消又人家寒食月花影午時
天又雨微吟思足花落夢無聊得於山中則有坡
暖冬生筍松涼夏健人又川明虹照雨樹密鳥衝
人得於江南則戍鼓和潮暗船燈照島幽又曲塘
春盡雨方響夜深船又夜短猿悲減風和鵲喜靈

得於塞下則有馬色經寒慘雕聲帶晚飢得於喪
亂則有驂騮思故第鸚鵡失佳人又鯨鯢人海涸
魑魅棘林幽得於道宮則有碁聲花院閉幡影石
壇高得於夏景則有池涼清鶴夢林靜肅僧儀得
於佛寺則有松日明金像苔龕響木魚又解吟僧
亦俗愛舞鶴終卑得於郊園則有遠坡春早慘猶
有水禽飛得於樂府則有晚粧留拜月春睡更生
香得於寂寥則有孤螢出荒池落葉穿破屋得於
愜適則有客來當意愜花發遇歌成雖庶幾不瀆
於淺涸亦未廢作者之譏訶也七言云逃難人多
分隙地放生鹿大出寒林又得劒乍如添健僕亡
書久似憶良朋又孤嶼池痕春漲滿小欄花韻午
晴初又故國春歸未有涯小欄高檻別人家五更
惆悵迴孤枕猶自殘燈照落花又甲子今重數生
涯只自憐殷勤元昨日旁午又明年皆不拘一槩
也蓋絕句之作本於詣極外千變萬狀不知所以

神而自神也豈容易哉今足下之詩時輩固有難及儻復以全美爲上卽知味外旨矣

與王駕評詩云末技之工雖蒙譽于賢哲未足自信必俟推于其類而後神躍而色揚今之贊藝者反是若卽醫而靳其病也唯恐彼之善察藥之我攻耳以爲率人以謾莫能自振痛哉且工之尤者莫若伎于文章其能不死于詩者比他伎尤寡豈可容易較量哉今王生五言所得長于思與境偕全唐詩話

卷五
十三

汲古閣

乃詩家之所尚者則前所謂必推于其類豈止神躍色揚哉

王禹偁五代史闕文云圖字表聖自言蒲州人有俊才咸通中登進士第雅好爲文躁于進取頗自矜伐端士鄙之從事使府泊登朝驟歷清顯巢賊之亂車駕播遷圖有先人舊業在中條山極林泉之美圖自禮部員外郎避地焉日以詩酒自娛屬天下板蕩士人多往依之互相推獎由是聲名籍

甚昭宗反正以戶部侍郎召至京師圖旣負才慢世謂已當爲宰輔時人惡之稍抑其銳圖憤憤謝病復歸中條與人書疏不名官位但稱知非子又稱耐辱居士其所居在禳貽谿之上結茅屋命曰休休亭嘗自爲亭記云云

已上梁史舊文

謹按圖河中虞

鄉人少有文采未爲鄉里所稱會王凝自尚書郎出爲絳州刺史圖以文謁之大爲凝知入知制誥遷中書舍人知貢舉擢圖上第頃之凝出爲宣州

全唐詩話

卷五
十四

汲古閣

觀察使辟圖爲從事旣渡江御史府奏圖監察下詔追之圖感凝知己之恩不忍輕離幕府滿百日不赴闕爲臺司所劾遂以本官分司久之召拜禮部員外郎俄知制誥故集中有文曰戀恩稽命黜繫洛師于今十年方忝綸閣此豈躁於進取者耶舊史不詳一至于是圖見唐政多僻知天下必亂卽棄官歸中條山尋以中書舍人召拜禮部戶部侍郎皆不起及昭宗播遷華下圖以密邇乘輿卽

時奔問復歸還山故其詩曰多病形容五十三誰
憐借笏赴朝參此豈有意于相位耶河中節度使
王重榮請圖撰碑得絹數千疋圖置于虞鄉市中
恣鄉人所取一日而盡是時盜賊充斥獨不入王
官谷河中士人依圖避難獲免者甚衆昭宗東遷
又以兵部侍郎召至洛下爲柳璨所阻一謝而退
梁祖授禪以禮部尚書召辭以老病卒時年八十
餘又按梁室大臣乃至有如敬翔李振杜曉楊涉

全唐詩話

卷五
十五

汲古閣

等皆唐朝舊族本以忠義立身重侯累將三百餘
年一旦委質朱梁其甚者贊成弑逆唯圖以清直
避世終身不仕梁祖故梁史捨圖小瑕以泯大節
者良有以夫題休休亭之楹曰咄嗟休休休莫莫
莫伎倆雖多性靈惡賴是長教閑處著休休休莫
莫莫一局碁一爐藥天意時情可料度白日偏催
快活人黃金難買堪騎鶴若曰爾何能荅云耐辱
莫柳璨爲相臣僚多被放逐圖爲監察御史尤加

畏慎昭宗郊禮畢上章懇乞致仕曰察臣本意非
爲官榮可驗衰羸庶全名節上特賜歸山其詔略
曰旣養高以傲世類移山以釣名心惟樂於湫流
仕非顯於食祿匪夷匪惠特忘反正之朝載省載
思當徇遯棲之志宜放歸中條山詔辭乃璨之文
也時多以四皓二疏譽之惟僧虛中云道裝汀鶴
識春醉野人扶言其操履檢身非傲世者也又云
有時看御札特地挂朝衣言其尊戴存誠非邀君
也

全唐詩話

卷五
十六

汲古閣

華下云日炙旱雲裂迸爲千道血天地沸一鑊竟
自烹妖孽堯湯遇災數災數還中輟何事奸與邪
古來難撲滅

僧舍貽友人云笑破人間事吾徒莫自欺解吟僧
亦俗愛舞鶴終卑竹上題幽夢溪邊約敵碁舊山
歸有阻不是故遲遲

下方云昏且松軒下怡然對一瓢雨微吟思足花

落夢無聊細事當
暴遣衰容喜鏡
篋溪僧有深趣
書至又相邀

秦韜玉

貧女云蓬門未識綺羅香
擬托良媒益自傷
誰愛風流高格調
共憐時世儉梳粧
敢將十指誇纖巧
不把雙眉鬪畫長
每恨年年厭針線
爲他人作嫁衣裳

韜玉字仲明京兆人父爲左軍將韜玉出入田令

全唐詩話

卷五
十七

汲古閣

孜之門又與劉曄李崑士姜垺蔡鋌之徒交遊中
貴各將兩軍書尺僥求巍科時謂對軍解頭僖宗
幸蜀韜玉以工部侍郎爲令孜神策判官小歸公
主文韜玉准敕及第仍編入榜中韜玉以書謝新
人呼同年曰三條燭下雖阻門闌數仞墻邊幸同
恩地

高駢

駢鎮蜀日以南詔侵暴築羅城四十里朝廷雖加

恩賞亦疑其固護或一日聞奏樂聲響知有改移
乃題風箏寄意曰夜靜絃聲響碧空宮商信任往
來風依稀似曲才堪聽又被移將別調中旬日報
到移鎮渚宮

又二妃廟云帝舜南巡去不還二妃幽怨水雲間
當時珠淚知多少直到如今竹尚斑

步虛詞云清溪道士人不識上天下天鶴一隻洞
門深鎖碧函寒滴露研硃點周易

全唐詩話

卷五
十八

汲古閣

聞河中王鐸加都統云煉汞燒鉛四十年至今猶
在藥爐前不知子晉緣何事只學吹簫使得仙

其驕

傲不平
如此

翁承贊

承贊乾寧進士也唐語云槐花黃舉子忙承贊有
詩云雨中粧點望中黃勾引蟬聲送夕陽憶得當
年隨計吏馬蹄終日爲君忙

皮日休

日休賦龜詩嘲歸氏子曰硬骨殘形知幾秋屍骸
終是不風流頑皮死後鑽須遍都爲平生不出頭
歸氏子以姓嘲日休云八片尖斜砌作毬火中燐
了水中揉一團閒氣如常在惹踢招拳卒未休

盧延遜

延遜吟詩多著尋常容易語如送周太保赴浙西
云臂鷹健卒懸氈帽騎馬佳人卷畫衫又寄友人
云每過私第邀看鶴長著公裳送上驢然於數篇

全唐詩話

卷五
十九

汲古閣

見意尤妙育松寺云山寺取涼當夏夜共僧蹲坐
石堦前兩三條電欲爲雨七八個星猶在天衣汗
稍停牀上扇茶香時發澗中泉通宵聽論蓮華義
不藉松窻一覺眠又苦吟云莫話詩中事詩中難
更無吟安一個字撚斷數莖鬚險覓天應問狂搜
海亦枯不同文賦易爲著者之乎

裴說

唐舉子先投所業於公卿之門謂之行卷說只行

五言十九首至來年秋賦復行舊卷人有譏之者
說曰只此十九首苦吟尚未有人見知何假別行
卷哉識者以爲知言天復六年登甲第其詩以苦
吟難得爲工且拘格律嘗有詩曰苦吟僧入定得
句將成功又贈僧貫休云總無方是法難得始爲
詩又云是事精皆易唯詩會却難遭亂故官不達
洛中作云莫怪苦吟遲詩成鬢亦絲鬢絲猶可染
詩病却難醫山暝雲橫處星沉月側時冥搜不易
全唐詩話
卷五
二十
汲古閣
得一句至公知

碁云十九條平路言平又嶮巖人心無算處國手
有輸時勢迫流星遠聲乾下雹遲臨軒纔一局寒
日又西垂

張爲

爲唐末江南詩人與周朴齊名如到處卽閉戶逢
君方展眉最有詩稱

杜光庭載毛僊翁事名于字鴻漸元和間劉禹錫

李紳白樂天輩皆贈詩至大中戊寅五十餘年矣
是歲張爲薄遊長沙不汲汲隨計獲女奴於岳麓
下惑之歲餘成羸疾仙翁一見曰子妖氣邪光浹
遍肌骨苟不相值殞於旦夕也以一粒授爲於香
爐焚之郁烈之氣聞百步魅妾一號而斃乃木偶
人也又吞以丹砂如黍者三疾遂瘳爲作詩別之
曰羸形感神藥削骨生豐肌蘭炷飄靈煙妖怪立
誅夷重覩日月光何報父母慈黃河濁袞袞別淚
流澌澌黃河清有時別淚無收期爲後入釣臺山
訪道而去

韓偓

苑中云上苑離宮處處迷相風高與露盤齊金堦
鑄出狻猊立玉柱雕成翡翠啼外使調鷹初得按

五方外索使以鷹隼初
調習始能禽獲之得案

中官過馬不教嘶

上乘馬
必中官

輕以進謂
之過馬

笙歌錦繡雲霄裏獨許詞臣醉似泥

醉着云萬里清江萬里天一村桑柘一村烟漁翁

全唐詩話

卷五
二十一

汲古閣

醉着無人喚過午醒來雪滿船
卽事云書墻暗記移花口洗瓮先知醞酒期須信
閒人有忙事早來衝雨覓漁師

香奩集和魯公之詞也惟其豔麗故貴後嫁其名
於偃凝平生著述分爲演綸游藝孝弟疑獄香奩
羸金六集自爲游藝集序云予有香奩羸金集不
行於世疑在政府避議論諱其名又欲後人知故
游藝集序實之此疑之意也沈存中云

全唐詩話

卷五
二十二

汲古閣

曹松

李肇國史補云曲江大會比爲下第舉人邇來漸
侈靡皆爲上列所占向之下第舉人不復預矣所
以逼大會則先牒教坊請奏上御紫雲樓垂簾觀
焉時或擬作樂則爲之移日故曹松詩云追遊若
遇三清樂行從應妨一日春敕下後人置皮袋例
以圖障酒器錢絹實其中逢花卽飲故張籍詩云
無人不借花園宿到處皆携酒器行其皮袋狀元

錄事同點檢闕一則罰金曲江之宴行市羅列闌
闌爲之半空公卿家率以是日揀選東牀車馬闌
塞莫可殫述

松及第敕下宴中獻座主杜侍郎詩云得召丘墻
淚却傾若無公道也無因門前送敕朱衣吏席上
銜杯碧落人半夜笙歌敎洗月平明桃杏放燒春
南山雖有歸溪路爭那酬恩未殺身

春日長安書事云浩浩看花晨六街揚遠塵城中

全唐詩話

卷五
二十三

波古閣

一丈日誰是晏眠人御柳舞着水野鶯啼破春徒
云還楚客猶自惜離秦

晨起云曉色敎不睡垂簾清氣中林殘數枝月髮
冷一梳風並鳥聞鐘語欹荷隔霧空莫徒營白日
道路本無窮

松有詩云憑君莫話封侯事一將功成萬骨枯可
謂諸世故矣

杜荀鶴

荀鶴有詩名號九華山人大順初擢第授翰林學士主客外郎知制誥序其文爲唐風集或曰荀鶴牧之微子也牧之會昌末自齊安移守秋浦時年四十四所謂使君四十四兩佩左銅魚者也時妾有妊出嫁長林鄉正杜筠而生荀鶴擢第年四十六矣

溪興云山雨溪風卷釣絲瓦甌蓬底獨斟時醉來睡著無人喚流下前溪也不知

全唐詩話

卷五
二十四

汲古閣

春宮怨云早被嬋娟誤欲妝臨鏡慵承恩不在貌教妾若爲容風暖鳥聲碎日高花影重年年越溪女相憶採芙蓉

鄭綰

古今詩話曰相國綰善詩有題老僧詩云日照西山雪老僧門未開凍瓶黏柱礎宿火陷爐灰童子病歸去鹿麕寒入來常云此詩屬對可以衡秤言輕重不偏也或曰相國近爲新詩否對曰詩思在

灞橋風雪中驢子上此何以得之蓋言平生苦心也

祭刺廬江將去別郡人云唯有兩行公廨淚一時灑向渡頭風其滑稽類此

錢珣

珣字瑞文吏部尚書徽之子善文辭宰相王溥薦知制誥進中書舍人溥得罪珣貶撫州司馬

永巷頻聞小苑遊舊恩如淚亦難收君前願報新

全唐詩話

卷五
二十五

汲古閣

顏色團扇須防白露秋

嚴憚

皮日休傷嚴子重序云余爲童在鄉校時簡上林杜舍人牧之集見有與進士嚴憚詩後至吳一日有客曰嚴某余志其名久矣遽懷文見造於是樂甚觀其所爲文工於七字往往有清便柔媚時可軼駿於常軌其佳者曰春光冉冉歸何處更向花前把一杯盡日問花花不語爲誰零落爲誰開余

羨之諷誦未嘗息生舉進士亦十餘計偕余方寃
之謂終有得於時也未幾歸吳興後兩暮咸通十
年也嘗人至云生以疾亡於所居矣噫生徒以詞
聞於士大夫竟不名而逝豈止此而堙沒耶江湖
間多美材士君子苟樂退而有文者死無不爲時
惜可勝言耶於是哭而爲詩曾望生之友也嘗爲
我作詩云十哭都門榜上塵蓋棺終是五湖人生
前有敵唯丹桂沒後無家祇白蘋若下斬新醒處

全唐詩話

卷五

二十六

汲古閣

月江南依舊詠來春知君精爽應無盡必在鄧都

頌帝晨

項梁成鄧都宮頌
曰綺絕標帝晨

王渙

大順中王渙自左史拜考功員外同年李德鄰自
右史拜小戎趙光胤自補袞拜小儀王極自小戎
拜小勳渙首唱長句感恩上裴公曰青衿七十勝
三年建禮舍香次第遷珠影下連星錯落桂花曾
對月嬋娟玉經磨琢多成器劔拔沉埋更倚天應

念銜恩最深者春來爲壽拜樽前裴公答曰謬持
文柄得時賢粉署清華次第遷昔歲策名皆健筆
今朝稱職並同年各懷器業寧推讓俱上青霄肯
後先何事老夫猶賦詠欲將酬和永流傳

渙字羣吉大順二年侍郎裴贄下登第德鄰極光
胤皆同年也

七夕瓊筵往事陳蓼花蓮蒂共傷神蜀王殿裏三
更月不見驪山私語人

全唐詩話

卷五
二十七

汲古閣

夢裏分明入漢宮覺來燈背錦屏空紫臺月落關
山曉腸斷君恩信画工

張曙

張曙崔昭緯中和初同舉相與詣日者問命曙時
自負才名籍甚以爲將來狀元崔亦分居其下日
者殊不顧曙第目崔曰將來萬全高第曙有愠色
日者曰郎君亦及第然須待崔拜相當此時過堂
旣而曙果不終場昭緯首冠曙以篇什刺之云千

里江山陪驥尾五更風水失龍鱗昨夜浣花溪上
雨綠楊芳草爲何人後七年昭緯爲相曙方登第
果於昭緯下過堂杜荀鶴同年生也酬曙詩云天
上書名天下傳引來齊到玉皇前大僊錄後頭無
雪至藥成來竈絕烟笑躡紫雲金作闕夢拋塵世
鐵爲船九華山叟驚凡骨同到蓬萊豈偶然

翁綬

詠酒云逃暑迎春復送秋無非綠蟻滿杯浮百年

全唐詩話

卷五
二十八

汲古閣

莫惜千回醉一盞能消萬古愁幾爲芳菲眠細草
曾因雨雪上高樓平生名利關身者不識狂歌到
白頭綬登咸通進士第

袁皓

皓宜春人咸通進士龍紀集賢殿圖書使自稱碧
池處士初登第過岳陽悅妓藥珠以詩寄嚴使君
曰得意東歸過岳陽桂枝香惹藥珠香也知暮雨
生巫峽爭奈朝雲屬楚王萬恨只憑期尅手寸心

唯繫別離腸南亭宴罷笙歌散回首烟波路渺茫
巖君以妓贈之

李濤

李濤長沙人也篇詠甚著如水聲長在耳山色不
離門又掃地樹留影拂床琴有聲又落日長安道
秋槐滿地花膾炙人口温飛卿任太學博士主秋
試濤與衛丹張郃等詩賦皆膺于都堂

王祝

全唐詩話

卷五
二十九

汲古閣

會昌時有題三鄉者曰余本若耶溪東與同志者
二三紉蘭佩蕙每貪幽閒之境翫花光於松月之
亭竟晝綿宵往往忘倦洎乎初筭至于五換星霜
矣自後不得已從良人西入函關寓居晉昌里第
其居迥絕囂塵花木叢翠東西鄰二佛宮皆上國
勝遊之最伺其閒寂因遊覽焉亦不辜一時之風
月也不意良人已矣邈然無依帝里芳春光景東
邁涉澆水歷渭川背終南陟太華經虢略抵陝郊

楫嘉祥之清流面女兒之蒼翠凡經過之所皆曩
昔謙笑之地街冤興歎舉目魂銷雖殘骸尚存而
精爽都失假使潘岳復生無以悼其幽思也遂命
筆聊題終不能滌其懷抱絕筆慟哭而東時會昌
壬戌歲仲春十九日詩曰昔逐良人西入關良人
身歿妾空還謝娘衛女不相待爲雨爲雲歸舊山
和者十人祝和三鄉詩云女兒山前嵐氣低佳人
留恨此中題不知雲雨歸何處空使王孫見欲迷

全唐詩話

卷五
三十

汲古閣

祝字不耀名家子唐末爲給事中

韋莊

長安清明云早是傷春夢雨天可堪芳草更芊芊
內官初賜清明火上相閑分白打錢紫陌亂嘶紅
叱撥綠楊高映畫鞦韆遊人記得承平事暗喜春
光似昔年

感懷詩云長安方悟少年非人道新詩勝舊詩十
畝野塘留客釣一軒春雨對僧碁花間醉任黃鸝

語亭上吟從白鷺窺大道不將爐冶去有心重築
太平基或謂此詩包括生成果爲台輔

莊字端已杜陵人見素之後曾祖少微宣宗中書
舍人莊疎曠不拘小節李詢爲西川宣諭和協使
辟爲判官以中原多故潛欲依王建建辟爲掌書
記尋召爲起居舍人表畱之後相建爲僞平章事

吳融

漁陽烽火照函關玉輦怱怱下此山一曲霓裳聽

全唐詩話

卷五
三十一

汲古閣

不盡至今猶恨水潺潺

融字子華越州人昭宗時爲翰林學士

公乘億

億字壽仙魏人與李山甫皆爲魏博樂彥禎幕府
億以詞賦著名咸通十三年別家十餘年矣嘗大
病鄉人傳以死其妻自河北迎喪會億送客馬上
見婦人麓褰類其妻也睇睨不已妻亦如之詰之
則是也相持而哭路人異之後旬日登第億嘗有

詩云十上十年皆落第一家一半已成塵可知其
屈矣

羅鄴

牡丹云落盡春紅始見花花時比屋事豪奢買栽
池館恐無地看到子孫能幾家門倚長衢攢繡輓
幄籠輕日護香霞歌鍾到此爭歡賞豈信流年鬢
有華

賞春云芳草和烟暖更青閑門要路一時生年年
全唐詩話

卷五
三十二

汲古閣

點檢人間事唯有春風不世情

鄴餘杭人父則爲鹽鐵小吏有二子俱以文學干
進鄴尤長七言詩

羅隱

隱字昭諫餘杭人隱池之梅根浦自號江東生爲
唐相鄭畋李蔚所知畋女覽隱詩諷誦不已畋疑
有慕才意隱貌寢陋女一日簾窺之自此絕不詠
其詩廣明中池守竇滂營墅居之光啓中錢鏐辟

爲從事節度判官副使梁祖以諫議召不行開平
中魏博羅紹威推爲叔父表授給事中年八十餘

終餘杭

有子
蹇翁

鍾陵妓雲英隱舊見之一日譏隱猶未第隱嘲之
曰鍾陵醉別十餘春重見雲英掌上身我未成名
君未嫁可能俱是不如人

牡丹云似共東君別有因絳羅高捲不勝春若教
解語應傾國任是無情也動人芍藥與君爲近侍

全唐詩話

卷五
三十三

汲古閣

芙蓉何處避芳塵可憐韓令功成後辜負穠華過
此身

蜂云不論平地與山尖無限風光盡被沾採得百
花成蜜後不知辛苦爲誰甜

許棠

棠洞庭詩有四顧疑無地中流忽有山之句人以
題扇過洞庭云驚波常不定半日鬢堪斑四顧疑
無地中流忽有山鳥飛應畏墮帆遠却如閒漁父

時相引行歌浩渺間

張蠙

送友人赴涇州幕云杏園沉飲散榮別就佳招日
月相期盡山川獨去遙府樓明蜀雪關磧轉胡鵬
縱有烟塵動應隨上策銷

蠙字象文唐末登第尉櫟陽避亂入蜀蜀王時爲
金堂令徐后遊大慈寺見壁間題云墻頭細雨垂
織草水面回風聚落花問寺僧僧以蠙對乃賜霞

全唐詩話

卷五
三十四

汲古閣

光晟令寫詩以進蠙進二百首衍善之召爲知制
誥宋光嗣以蠙輕忽傲物遂止卒于官蠙生穎秀
幼有單于臺詩曰白日地中出黃河天外來爲世
所稱

鄭谷

谷字若愚袁州人故永州刺史之子幼年司空圖
與刺史同院見而奇之曰曾吟得丈丈詩否曰吟
得莫有病否曰丈丈曲江晚望斷篇云村南斜日

閒回首一對鴛鴦落渡頭卽深意矣司空歎惜撫
背曰當爲一代風騷主乾寧中爲都官郎中卒於
家谷自敘云故許昌薛尚書能爲都官郎中後數
年建州李員外自憲府內彈拜都官員外皆一時
騷雅宗師都官之曹振盛於此余早受知今忝此
官復是正秩何以相繼前賢耶

濃淡方春蒲蜀鄉半隨風雨斷鶯腸浣花溪上堪
惆悵子美無情爲發揚谷蜀中海棠詩也

全唐詩話

卷五

三十五

汲古閣

相看臨遠水獨自上孤舟句潮平無別浦木落見

他山句情多最恨花無語愁破方知酒有權句關

東多事日天未未歸心句捲卷斜陽裏看山落木

中句兩浙尋山徧孤舟帶鶴歸句長安一夜殘春

雨右省三年老拾遺句班趨黃道急殿揖紫宸深

句

題杭州樟亭云故國江天外登臨返照閒潮平無
別浦木落見他山沙鳥晴飛遠漁人夜唱閒歲窮

歸未得心逐片帆還

感興云禾黍不陽艷競栽桃李春翻令力耕者半
作賣花人

十日菊云節去蜂愁蝶不知曉庭還繞折殘枝自
緣今日人心別未必秋香一夜衰

偶題云一卷疎蕪一百篇名成未敢便忘筌何如
海日生殘夜一句能令萬古傳

溫憲

全唐詩話

卷五
三十六

汲古閣

溫憲員外庭筠子也僖昭之間就試於有司值鄭
相延昌掌邦貢以其父文多刺時復傲毀朝士抑
而不錄旣不第遂題一絕於崇慶寺壁後滎陽公
登大用因國忌行香見之憫然動容暮歸宅已除
趙崇知舉卽召之謂曰某頃主文衡以溫憲庭筠
之子深怒嫉之今日見一絕令人惻然幸勿遺也
於是成名詩曰十口溝隍待一身半年千里絕音
塵鬢毛如雪心如死猶作長安下第人

李昌符

秋晚歸故居云馬省曾行處連嘶渡晚河忽驚鄉
樹出漸識路人多細徑穿禾黍頽垣壓薜蘿乍歸
猶似客鄰叟亦相過

傷春云酒醒鄉關遠迢迢聽漏終曙分林影外春
盡雨聲中鳥思江村路花殘野岸風十年成底事
羸馬倦西東

昌符字崑夢登咸通四年進士第歷尚書郎

全唐詩話

卷五
三十七

汲古閣

北夢瑣言云咸通中前進士李昌符有詩名久不
登第常歲卷軸怠於裝修因出一奇乃作婢僕詩
五十首於公卿間行之其間有詩云春娘愛上酒
家樓不怕歸遲總不憂報道那家娘子臥且留教
住待梳頭又云不論秋菊與春花個個能噉空肚
茶無事莫教頻入庫一名閒物要些些諸篇皆中
婢僕之諱浹旬京城盛傳是年登第與夫挑杖虛
靴事雖不同用奇卽無異也

李山甫

咸通中數舉進士被黜依魏府樂彥禎幕府因樂
禍且怨中朝大臣導彥禎子從誦伏兵殺王鐸劫
其家嘗有詩云勸君莫用誇頭角夢裏輸贏總未
真譏執政也巢寇之亂翰林待詔王遵者北遊在
鄴山甫過於道觀謂曰幽蘭綠水可得聞乎遵應
命奏之曲終潸然曰憶在咸通玉亭秋夜供奉至
尊不意流離至此也山甫賦詩曰幽蘭綠水耿清

全唐詩話

卷五
三十八

汲古閣

音歎息先生在用心世上幾時曾好古人前何必
獨霑襟句未成山甫亦自黯然悲其不遇也一本
云情知此事少知音自是先生在用心世上幾時
曾好古人前何必更霑襟致身不似笙簧巧悅耳
寧如鄭衛淫三尺絲桐七條線子期師曠兩沉沉
貧女云平生不識綺羅裳閒把荆簪益自傷鏡裏
祇應諳素貌人間多是重紅粧當年未嫁還憂老
終日求媒卽道狂兩意定知無說處暗垂珠淚滴

蠶筐

國初高英秀者與贊寧爲師友辯捷滑稽嘗譏古人詩病云山甫覽漢史王莽弄來曾半破曹公將去便平沉是破船詩李羣玉詠鷓鴣方穿詰曲崎嶇路又聽鈞輶格磔聲是梵語詩羅隱曰雲中雞犬劉安過月裏笙歌煬帝歸是見鬼詩杜荀鶴今日偶題題似著不知題後更誰題此衛子詩也不然安有四蹄

全唐詩話

卷五
三十九

汲古閣

鍾離權

邢州開元寺有唐鍾離權處士二詩其一云得道高僧不易逢幾時歸去願相從自言住處連滄海則是蓬萊第一峰其二云莫厭追歡笑語頻尋思離亂可傷神閒來屈指從頭數得見清平有幾人

張道古

昭宗時拾遺張道古貢五危二亂表黜居于蜀後聞駕走西岐又遷東洛皆契五危之事悉歸二亂

之源因吟一章上蜀王詩曰封章才達冕旒前黜
詔俄離玉座端二亂豈由明主用五危終被佞臣
彈西巡鳳府非爲固東播鑾輿卒未安諫疏至今
如尚在誰能更與讀來看

道古臨淄入景福中進士釋褐爲著作郎遷右拾
遺播遷之後方鎮阻兵道古上危亂疏云只今劉
備孫權已生於世矣謫施州司戶叅軍後入蜀王
氏聞而憾之乃變姓名賣卜導江青城市中建開

全唐詩話

卷五
四十

汲古閣

國召爲武部郎中至玉壘關謂所親曰吾唐室諫
臣終不能拳跽與雞犬同食雖召必再貶於死之
日塋我於關東不毛之地題曰唐佐輔補闕張道
古墓後遇害妻亦繼亡蜀主憫之俾祔葬焉鄭雲
叟在華聞之有詩哭之曰曾陳章疏忤昭皇撲落
西南事可傷豈使諫臣終屈辱直疑天道惡忠良
生前賣卜居三蜀死後馳名遍大唐誰是後來修
史者言君力死正顏綱

胡曾

王衍五年宴飲無度衍自唱韓琮柳枝詞曰梁苑
隋堤事已空萬條猶舞舊_看風何如思想千_年事
惟見楊花入漢宮內侍宋光溥詠曾詩曰吳王恃
霸棄雄才貪向姑蘇醉綠醅不覺錢塘江上月一
宵西送越兵來衍怒罷宴曾有詠史詩百篇行於
世

伍唐珪

全唐詩話

卷五
四十一

汲古閣

寒食日獻郡守云入門堪笑復堪憐三徑苔荒一
釣船慚愧四隣教斷火不知厨裏久無烟

唐珪唐末進士也

全唐詩話卷五

終

全唐詩話卷六

韓定辭

定辭爲鎮州王鎔書記聘燕帥劉仁恭舍於賓館命幕客馬彧延接馬有詩贈韓云燧林芳草綿綿思盡日相攜陟麗譙別後囷嵒山上望羨君時復見王喬或詩清秀然意在試其學問韓於座酬之曰崇霞臺上神仙客學辨癡龍藝最多盛德好將銀筆述麗詞堪與雪兒歌座賓靡不欽訝然亦疑

全唐詩話

卷六

汲古閣

銀筆之僻也他日或持燕帥之命答聘常山亦命定辭接於宮館或從容問韓以雪兒銀筆之事韓曰昔梁元帝爲湘東王時好學著書常紀忠臣義士及文章之美者筆有三品或以金銀雕飾或以斑竹爲管忠孝全者用金管書之德行清粹者用銀筆書之文章瞻麗者以斑竹書之故湘東之譽振於江表雪兒者李密之愛姬能歌舞每見賓僚文章有奇麗入意者卽付雪兒叶音律以歌之又

問癡龍出自何處定辭曰洛下有洞穴曾有人誤墮於穴中因行數里漸見明曠見有宮殿人物凡九處又見有大羊羊髯有珠人取而食之不知何所後出以問張華華曰此地仙九館也大羊者名曰癡龍耳定辭復問或矐嵒山當在何處或曰此隨郡之故事何謙光而下問由是兩相悅服結交而去

同谷子

全唐詩話

卷六
二

汲古閣

昭宗播岐何后用事有同谷子者詠五子之歌何后潛令秦王誅之事未行而奔去詩曰邦惟固本自安寧臨下長須馭朽驚何事十旬遊不返禍胎從此召殷兵酒色聲禽號四荒那堪峻宇又雕墻靜思今古爲君者未或因茲不滅亡惟彼陶唐有冀方少年都不解思量如今筭得當年事首爲盤遊亂紀綱明明我祖萬邦君典則貽將示子孫惆悵太康荒墜後覆宗絕祀滅其門仇讐萬姓遂無

依顏厚何曾解忸怩五子旣歌邦已失一場前事
悔難追

沈彬

彬字子文高安人也天性狂逸好神仙之事少孤
西遊以三舉爲約常夢著錦衣貼月而飛識者言
雖有虛名不入月矣洪州解至長安初舉納省卷
夢仙謠云玉殿大開從客入金桃爛熟沒人偷鳳
驚寶扇頻翻翅龍悟金鞭忽轉頭第二舉憶仙謠

全唐詩話

卷六

汲古閣

云白榆風颯九天秋王母朝廻宴玉樓日月漸長
雙鳳睡桑田欲變六鼇愁雲翻簫管相隨去星觸
旌幢各自流詩酒近來狂不得騎龍却憶上清遊
第三舉納省卷贈劉象爲首云曾應大中天子舉
四朝風月鬢蕭疎不隨世祖重攜劍却爲文皇再
讀書十載戰塵銷舊業滿城春雨壞貧居一枝何
事於君惜仙桂年年幸有餘時劉象孤寒三十舉
無成主司覽彬詩其年特放象及第彬乾符中值

駕遷三峰四方多事南遊嶺表二十餘年回吳中
江南僞命吏部郎中致仕彬詩有九衢冠蓋暗爭
路四海干戈多異心之句

周朴

朴唐末詩人寓於閩中僧寺假文室以居不飲酒
茹葷塊然獨處諸僧晨粥卯食朴亦攜巾盂厠諸
僧下畢飯而退率以爲常郡中豪貴設供率施僧
錢朴卽巡行拱手各丐一錢有以三數錢與者朴

全唐詩話

卷六
四

汲古閣

止受其一耳得千錢以備茶藥之費將盡復然僧
徒亦未嘗厭也性喜吟詩尤尚苦澁每遇景物搜
竒抉思日旰忘返苟得一聯一句則忻然自快嘗
野逢一負薪者忽持之且厲聲曰我得之矣樵夫
矍然驚駭掣臂棄薪而走遇巡徼卒疑樵者爲偷
兒執而訊之朴徐往告卒曰適見負薪因得句耳
卒乃釋之其句云子孫何處閑爲客松栢被人伐
作薪彼有一士人以朴僻於詩句欲戲之一日跨

驢於路遇朴在傍士人乃歛帽掩頭吟朴詩云禹
力不到處河聲流向東朴聞之忽遽隨其後且行
士但促驢而去略不回首行數里追及朴告之曰
僕詩河聲流向西何得言流向東士人領之而已
閩中傳以爲笑或曰曉來山鳥鬧雨過杏花稀亦
朴詩也古陵寒雨絕高鳥夕陽明句高情千里外
長嘯一聲初句

黃巢至福州求得朴問曰能從我乎答曰我尚不

全唐詩話

卷六
五

汲古閣

仕天子安能從賊巢怒殺之

孫魴

潤州金山寺張祐孫魴留詩爲第一篇山居大江
中迥然孤秀詩意難盡羅隱云老僧齋罷關門睡
不管波濤四面生孫生句云結宇孤峰上安禪巨
浪間又曰萬古波心寺金山名曰新天多剩得月
地少不生塵過櫓妨僧定驚濤濺佛身誰言張處
士題後更無人魴夜坐句云劃多灰漸冷坐久席

成痕沈彬曰此田舍翁火爐頭之作爾魴南昌人唐末鄭谷避亂歸宜春魴往依之頗爲誘掖後有能詩聲終於南唐魴父畫工也王微爲中書舍人草魴誥詞云李陵橋上不吟取次之詩顧凱筆頭豈畫尋常之物魴終身恨之

王易簡

易簡唐末進士梁乾化中及第名居榜尾不看榜却歸華山尋就山釋褐授華州幕職後召入拜左全唐詩話

卷六

汲古閣

拾遺及辭官歸隱留詩一絕曰汨沒朝班愧不才誰能低折向塵埃青山得去且歸去官職有來還自來及再召爲郎遷諫垣臺閣三十年歸華山十年而終

范攄之子

吳人范攄處士之子七歲能詩贈隱者云埽葉隨風便澆花趁日陰方干曰此子他年必成名又吟夏日云閒雲生不雨病葉落非秋干曰惜哉必不

享壽果十歲卒

鄭雲叟

鄭徵君爲詩皆祛滯靡迥絕囂塵如富貴曲云美人梳洗時滿頭間珠翠豈知兩片雲戴却數鄉稅有詠西施云素面已云妖更着花鈿飾臉橫一寸波浸破吳王國又七言傷時云帆力劈開滄海浪馬蹄踏破亂山青浮名浮利過於酒醉得人心灰不醒又題霍山秦尊師云老鶴玄猿伴採芝有時

全唐詩話

卷六
七

汲古閣

長嘯獨移時翠蛾紅粉嬋娟劍殺盡世人人不知又偶題似鶴如雲一箇身不憂家國不憂貧擬將枕上日高睡賣與世間富貴人又思山詠因賣丹砂下白雲鹿裘怕惹九衢塵不如將爾入山去萬是千非愁殺人又景福中作云悶見戈鋌匝四溟恨無竒策救生靈如何飲酒得長醉直到太平時節醒人招友遊春云難把長繩繫日烏芳時偷取醉工夫任堆金僻磨星斗買得花枝不老無又山

屠云間見有人尋移庵更入深落花流澗水明月
照松林醉勸頭陀酒閒教孺子吟身同雲外鶴斷
得世塵侵又詩云真心棲木室散髮浸流泉採柏
時逢麝看雲忽見山夏狂衝雨戲春醉戴花眠絕
頂登雲望東都一點烟又詩不求朝野知卧見歲
華移採藥歸侵夜聽松飯過時荷竿尋水釣背局
上崑崙祭廟人來說中原正亂離

僧子蘭

全唐詩話

卷六
八

汲古閣

太平里尋兵部裴郎中云不語淒涼無限情荒階
行盡又重行昔年住此人何在空見槐花秋草生

僧靈澈

生於會稽本湯氏字澄源與吳興詩僧皎然遊然
薦之包吉李紆以是上人之名由二公而颺正元
中遊京師緇流嫉之造飛語激動中貴人侵誣得
罪徙汀州後歸會稽元和十一年終于宣州劉夢
得曰詩僧多出江右靈一導其源護國襲之清江

揚其波法振沿之如云絃孤韻瞥入人耳非大音
之樂獨吳興晝公能備衆體澈公承之至如芙蓉
園新寺詩曰經來白馬寺僧到赤烏年謫汀州云
青蠅爲弔客黃犬寄家書可會入作者闔域豈獨
雄於詩僧間耶

九日和于使君思上京親故云清晨有高會賓從
出東方楚俗風烟古汀州草木涼山情來遠思菊
意在重陽心憶華池上從容鴛鷺行

全唐詩話

卷六
九

汲古閣

僧靈一

新泉詩云泉源新湧出洞澈映織雲稍落芙蓉沼
初淹苔蘚文了將空色淨素與衆流分若對清宵
月泠然夢裏聞

劉長卿和云東林一泉水復與遠公期石淺寒流
處山空夜落時夢闌聞細響慮澹向清漪動靜皆
無意唯應道者知

高仲武云自齊梁以來道人爲文者多矣少有人

其流一公乃能尅意精妙與士大夫更唱迺和不
其偉與泉湧堦前地雲生戶外峰則遺猷寶月曾
何及此靈一大曆正元間僧也

酬皇甫冉西陵見寄云西陵潮信滿島嶼沒中流
越客依風水相思南渡頭寒光生極浦落日暎滄
洲何事揚帆去空驚海上鷗

溪行卽事云近液山更碧入林溪轉清不知伏牛
地潭洞何縱橫曲岬烟初合平湖月未生孤舟屢

全唐詩話

卷六
十

汲古閣

失道但聽秋泉聲

重還宜豐寺云載過招隱寺重會息心期樵客問
歸日山僧記別時野雲陰遠甸秋水漲前陂勿謂
頻來此吾今不好奇

皇甫冉以下三章
姚合取爲極玄集

酬皇甫冉將赴無錫雲門寄別云湖南通古寺來
往意無涯欲識雲門路千峰向若耶春山子建宅
古木謝敷家自是長俱隱那云相去賒

宿天柱觀詩云石室初投宿仙翁幸見容花源隨

水遠洞府過山逢泉湧堦前地雲生戶外峰中宵
自入定非是欲降龍

僧清江

病起云身世足堪悲空房卧病時捲簾槐雨滴埽
室竹陰移已覺生如夢那堪壽不知未能通法性
詎可見支離

僧廣宣

王起於會昌中放第二榜宣以詩寄賀曰從辭鳳

全唐詩話

六卷
十一

汲古閣

閣掌絲綸便向青雲領貢賓再闢文場無枉路兩
開金榜絕冤人眼看龍化門前水手放鶯飛谷口
春明日定歸台席去鶴鴿原上共陶鈞起和云延
英面奉入春闈亦選工夫亦選奇在冶只求金不
耗用心空學秤無私龍門變化人皆望鶯谷飛鳴
自有時獨喜向公誰是證彌天上士與新詩時劉
夢得元微之皆和之宣與夢得最善

退之有廣宣上人頻見過詩云三百六旬常擾擾

不衝風雨卽塵埃久慙朝士無裨補空愧高僧數
往來學道竊年何所得吟詩竟日未能迴天寒古
寺遊人少紅葉窓前有幾堆

僧法振

趙使君生子晬日詩云毛骨貴天生肌膚玉雪明
見人空解笑弄物不知名國器嗟猶小風姿望亦
清抱來芳樹下時聽鳳凰聲

僧皎然

全唐詩話

卷六
十二

汲古閣

僧皎然一日嘗於舟中抒思作古體十數篇求合
韋蘇州韋大不喜明日獻其舊製乃極稱賞云何
不但以所工見投而猥希老夫之意人各有所得非
卒能致畫大服其鑒裁之精

同裴錄事樓上望云退食高樓上湖山向晚晴桐
花落萬井月影出重城水竹涼風起簾帷暑氣清
蕭蕭獨無事因見蒞人情

皎然詩式著偷語詩例云如陳后主詩日月光天

德取傳長虞日月光太清上三字語同下二字義
同偷意詩例云如沈佺期詩小池殘暑退高樹早
涼歸取柳渾太液滄波起長楊高樹秋偷勢詩例
云如王昌齡詩手攜雙鯉魚目送千里鴈悟彼飛
有適嗟此罹憂患取稽康目送歸鴻手揮五絃俯
仰自得遊心太玄詩式云詩有跌宕格二品一曰
越俗其道如黃鶴臨風貌逸神王杳不可羈郭景
純遊仙詩左把浮丘神右拍洪崖肩鮑明遠詩舉

全唐詩話

卷六
十三

汲古閣

頭四顧望但見松栢繁荆棘鬱叢叢中有一鳥名
杜鵑言是古時蜀帝冤聲音哀苦鳴不息羽毛憔悴
似人髡飛走樹間啄蟲蠶豈知往日天子尊念
茲變化非常理中間惻隱不能言二曰駭俗其道
如楚有接輿魯有原壤外示驚俗之貌內藏達人
之度郭景純遊仙詩嫦娥揚妙音洪崖頷其頤王
梵志道情詩我昔未生時冥冥無所知天公長生
我生我復何爲無衣使我寒無食使我飢還你天

公我還我未生時賀知章放達詩云落花真好些
一醉一回顛盧照鄰漫作云城狐尾獨速山鬼面
叅覃澁沒格一品曰澹俗此道如夏姬當爐似蕩
而貞采吳楚之風雖俗而正古歌曰華陰山頭百
尺井下有流泉徹骨冷可憐女子來照影不照其
餘照斜領調笑格一品曰戲俗漢書云匡鼎來解
人頤蓋說詩也此一品非雅作足以爲談笑之資
矣李白狂詠女媧弄黃土搏作愚下人散在六合
間濛濛若埃塵

全唐詩話

卷六
十四

汲古閣

賦得猿啼送客三峽云萬里巴江外三聲月峽深
何年有此路幾客共霑襟斷臂分重影流泉入苦
吟淒淒離別後聞此更傷心

僧文秀

端午詩云節分端午自誰言萬古傳名爲屈原堪
笑楚江空浩浩不能洗得直臣冤

秀唐末詩僧也鄭谷喜秀上人相訪詩他夜松堂

宿論詩更入微之句又次韻秀上人長安寺居言
懷云舊齋松老別多年香社人稀喪亂間出寺只
如趨內殿閉門長似在深山又重訪秀上人云展
畫長懷吳寺殿宜茶偏賞雪溪泉又寄題詩僧秀
公云靈一心傳清塞心可公吟後楚公吟近來雅
道相親少唯仰吾師所得深好句未停無暇日舊
山歸老有東林吟曹孤宦甘寥落多謝攜筇數訪
尋秀南僧也而居長安以文章應制故谷送遊五
臺詩云內殿評詩切身迴心未迴

全唐詩話

卷六
十五

汲古閣

僧棲白

中秋夜月云尋常三五夕不是不嬋娟及到中秋
滿還勝別夜圓清光凝有露皓色爽無烟自古人
皆翫年來更一年

哭劉德仁云爲愛詩名吟到此風蒐雪魄去難招
直教桂子落墳上生得一枝寃始銷

冬日寄僧友云歛屨入寒竹安禪過漏聲高杉殘

葉落深井凍痕生
罷磬松枝動懸燈雪屋明
何當招我友乘月上方行

秋夜宿西林寄賈島云
暗蟲喧暮色默思坐西林
聽雨寒更盡開門落葉深
昔因京邑病併起洞庭心
亦是吾兄事遲迴直至今

秋日寄厲元云楊柳起秋色
故人猶未還別離何自苦
少壯豈能閑連雨吟殘燭
秋城憶遠山何當同一見
語默此林間

全唐詩話

卷六
十六

汲古閣

廬山寺云千峰盤磴盡
林寺昔年名步步入山影
房房聞水聲多年人跡絕
殘月石陰清更可求居
止安閒過此生

金州別姚合云日日西亭上
春留到夏殘言之離別
易允矣道途難山出一
千里溪行三百灘松間
樓月裏秋入五陵寒

姚合送無可往越州云
清晨相訪門前立麻屨
方袍一少年懶讀經文
求作佛願攻詩句覓成
仙芳

春山影花連寺觸夜潮聲月滿船今日送行偏惜
別共師文字有因緣

僧懷濬

姊歸郡僧懷濬不知何所人乾寧初知來識往昔
有神驗刺史于公以其惑衆繫而詰之乃以詩代
通狀云家在閩山西復西其中歲歲有鶯啼如今
不在鶯啼處鶯在舊時啼處啼又詰之復有詩云
家在閩山東復東其中歲歲有花紅而今不在花
全唐詩話

卷六
十七

汲古閣

紅處花在舊時紅處紅守異而釋之詳其詩意似
在海中得非杯渡之流乎

出北夢
瑣言

僧可朋

可朋丹稜人少與盧延讓爲風雅之交有詩千餘
篇號玉壘集會題洞庭詩曰水涵天影澗山拔地
形高贈友人曰來多不似客坐久却垂簾歐陽炯
以此比孟郊賈島言其好飲酒貧無以償酒債故
時調之可朋自號醉髡贈方干詩云月裏豈無攀

桂分湖中空賞釣魚休杜甫舊居云傷心盡日有
啼鳥獨步殘春空落花寄齊已云雖陪北楚三千
客多話東林十八賢劉公詩話云有詩僧讀洪州
滕王閣詩謂守者詩總不佳何不除却守曰僧能
佳乎卽吟曰洪州太白方積翠蒲空蒼萬古遮新
月半江無夕陽守異之然南方浮屠能詩者多矣
予嘗見可朋詩云虹收千嶂雨潮落半江天又云
詩因試客分題僻碁爲饒人下着低不減古人

全唐詩話

卷六
十八

汲古閣

僧雲表

寒食詩云寒食時看郭外春野人無處不傷神平
原索索添新塚半是去年來哭人

僧貫休

姓姜氏字德隱婺州蘭溪人錢鏐自稱吳越國王
休以詩投之曰貴逼身來不自由幾年勤苦踏林
丘滿堂花醉三千客一劍霜寒十四州萊子衣裳
宮錦窄謝公篇詠綺霞羞他年名上凌烟閣豈羨

當時萬戶侯鏐諭改爲四十州乃可相見曰州亦
難添詩亦難改然閒雲孤鶴何天而不可飛遂入
蜀以詩投王建曰河北河南處處災惟聞全蜀少
塵埃一瓶一鉢垂垂老千水千山得得來秦苑幽
棲多勝景巴歛陳貢愧非才自慙林藪龍鐘者亦
得親登郭隗臺建遇之甚厚建二年春令誦近詩
時貴戚皆坐休欲諷之乃稱公子行云錦衣鮮華
手擎鶻閒行氣貌多輕忽稼穡艱難總不知五帝
三皇是何物建稱善貴倖皆怨之休與齊已齊名
有西岳集十卷吳融爲之序卒歿于蜀

全唐詩話

卷六
十九

汲古閣

赤旃檀塔六七級白菡萏花三四枝禪客相逢只
彈指此心能有幾人知石霜問云如何是此心休
不能答石霜云汝問我答休卽問之霜云能有幾
人知

春山行云重疊太古色濛濛花雨時好山行恐盡
流水語相隨黑壤生紅朮黃猿領白兒因思石橋

月曾與道人期

晚泊湘江懷古云烟浪漾秋色高吟似得鄰一林
湘渚月千古獨醒人岸濕穿花遠風香禱廟頻只
應諛佞者到此不傷神

天台老僧云獨住無人處松龕嶽雪侵僧中九十
臘雪外一生心白髮垂不剃青眸笑更深猶能指
孤月爲我暫開襟

寒思廬山賈生云山深詩癖甚寒夜更何爲覓句
全唐詩語

卷六
二十六

汲古閣

如頑坐巖霜打不知石膏黏木履崖栗落水池近
見禪僧說生涯勝在時

題嶧桐律師禪院云律中麟角者高叟出塵埃芳
草不曾觸幾生如此來壑風吹磬斷杉露滴花開
如結林中社伊余願一陪

言詩云經天緯地物動必是仙才竟日覓不得有
時還自來真風含素髮秋色入靈臺吟向霜蟾下
終須神鬼哀

休糧僧云不食更何求自由中自由身輕嫌衲重
天旱爲民愁供噐誰將去生臺蟻不遊會須傳此
術歸去老林丘

詎是言休卽便休清吟孤坐碧溪頭三間茅屋無
人到十里松門獨自遊明月清風宗炳社夕陽秋
色庾公樓修心未到無心地萬種千般逐水流

心心心不佳希夷石室巉嵒白髮垂惜竹不除當
路笋愛松留得礙人枝焚香開卷雲生砌捲箔冥

全唐詩話

卷六
二十一

汲古閣

心月在池無限故人頭盡白不知頭白更何之

自古浮華能幾何逝波今日去滔滔漢王廢苑生
秋草吳王荒宮入夜濤滿屋黃金機不息一頭白
髮氣猶高豈知物外金仙子甘露天香滴毳袍

古意云乾坤有清氣散入詩人脾聖賢遺清風不
在惡木枝千人萬人中一人兩人知意在東溪日
花開葉落時幾擬以黃金鑄作鍾子期

僧齊已

戊辰歲湖中寄鄭谷郎中云白髮久慵簪常聞病
亦吟瘦應成鶴骨閒想似禪心上國楊花亂滄洲
荻笋深不堪思翠華西望獨沾襟

山寺喜道士至云閏年春過後山寺始花開還有
無心者閒尋此境來鳥幽聲忽斷茶好味重廻知
在南崑久冥心坐綠苔

登祝融峰云猿鳥共不到我來身欲浮四邊空碧
落絕頂正清秋宇宙知何極華夷見細流壇西獨

全唐詩話

卷六
二十一

汲古閣

立久斜日轉神州

宿簡寂觀云萬壑雲霞影千峰松桂聲如何教下
士容易信長生月共虛無白香和沆瀣清閒尋古
廊畫記得列仙名

僧西蟾

短歌行云蟾光堪自笑浮世懶思量身得幾時活
眼開終日忙千金無壽藥一鏡有愁霜早向塵埃
外光陰任短長

僧清塞

贈王道士云藥力資蒼鬢應非舊日身一爲嵩岳
客幾葬洛陽人冰縫瓢探水雲根斧斨薪關西往
來熟誰得水銀銀

贈幼群法師云北京從別後南越幾聽砧住久白
髭出講長黃葉深香連鄰舍像磬徹遠巢禽寂寞
應關道何人見此心

送耿逸人南歸云南行隨越僧舊葉一池菱兩鬢

全唐詩話

卷六
二十三

汲古閣

已如雪五湖歸掛罾夜濤鳴柵鎖寒葦露船燈此
去應無事却來期未能

早秋過郭勁書齋云暑消崗舍清閒坐有餘情石
水生茶味松風減扇聲遠雲收海雨靜角掩山城
此地清吟苦時來遶菊行

送康沼歸建業云南朝秋色滿歸去思如何帝業
空城在民耕壞塚多月明臺獨上栗綻寺頻過籬
下西江濶相思克白波

贈百崑禪師云野寺絕依念空山曾徧行老來披
衲重病起讀經生乞食嫌村遠尋溪愛踏平多年
百崑主不記百崑名

贈胡僧云瘦形無血色草履着從穿閒語以持呪
不眠同坐禪背經來漢地袒膊過冬天情性人難
會遊方應信緣

贈絕粒僧云一齋難過日況復更休糧養力時行
道聞鐘不上堂唯留煨藥火不寫化金方舊有山

全唐詩話

卷六
二十四

汲古閣

厨在從僧請作房

晚秋江館云病寄泗州居帶城傍門高柳一蟬鳴
澄江月上見魚擲荒徑葉乾聞犬行越嶠夜無侵
閣色寺鐘涼有隔原聲故園賣盡休歸去湖水秋
來空自平

贈李道士云布褐高眠石竇春迸泉多濺黑紗巾
昂頭說易當閒客落手圍碁對俗人自筭天年竅
甲子誰同雨夜守庚申擬歸太華何時去他日相

逢乞藥銀

秋日同朱慶餘懷少室舊隱云曾居少室黃河畔
秋夢長懸未得迴扶病十年離水石思歸一夜隔
風雷荒齋幾度僧眠起晚菊頻經塵路來燈下此
心誰共說傍松幽徑已多苔

師東洛人姓周氏少從浮圖法遇姚合而返乃易
名賀初與賈長江無可齊名賀哭百崑師云林逋
西風急松枝構杪餘凍鬚亡夜剃遺偈疾時書地
全唐詩話

卷六
廿五

汲古閣

燥焚身後堂空卧影初此時頻下淚曾省到吾廬
時島亦有詩云苔覆石床新師曾過幾春寫留行
道影焚却坐禪身塔院關松雪經房鎖隙塵自嫌
雙淚下不是解空人時謂相伴云兩鬢已垂雪五
湖歸釣魚送人夜濤鳴柵鎖寒葦露船燈句石水
生茶味松風減扇聲句磬徹遠巢禽句伊流背行
客岳響答清猿句

唐有周賀詩卽清塞也秋宿洞庭云洞初秋葉下

旅客不勝愁明月天涯夜青山江上秋一官成白
首萬里寄滄洲只被浮名繫寧無愧海鷗

巴陵秋思云楊柳已寒色楚田方刈禾歸心病起
切敗葉夜來多細雨城蟬噪殘陽嶠客過故鄉餘
業在杳隔洞庭波

岳陽樓云平楚起寒色杪秋猶未還世情何處淡
湘水向人間空翠隱高鳥夕陽歸遠山孤舟萬里

外惆悵洞庭間

三詩作
周賀

全唐詩話

卷六
廿六

汲古閣

僧文益

看牡丹云擁毳對芳叢由來趣不同髮從今日白
花是去年紅艷色隨朝露馨香逐晚風何須待零
落然後始知空

僧修睦

秋日間居云是事不相關誰人似此閒捲簾當白
晝移榻對青山野鶴眠松上秋苔長雨間嶽僧頻
有信昨日得書還

睡起作云長空秋雨歇睡起覺清神看水看山坐
無名無利身偈吟諸祖意茶碾去年春此外誰相
識孤雲到砌頻

題東林云欲去不忍去徘徊吟遠廊水光秋澹蕩
僧好語尋常碑古苔文疊山晴鐘韻長翻思南嶽
上欠此白蓮香

僧景雲

畫松云畫松一似真松樹且待尋思記得無曾在

全唐詩話

卷六
廿七

汲古閣

天台上見石橋南畔第三株

僧可止

哭賈島云燕生松雪地蜀苑塋山根詩癖降今古
官卑誤子孫塚欄寒月色人哭苦吟蒐暮雨滴碑
字年年添蘚痕

僧卿雲

長安言懷寄沈彬侍郎云故園黎嶺下歸路接天
涯生作長安草勝爲邊地花鴈南飛不到書北寄

來賒堪羨神仙客青雲早致家

舊國里云舊居黎嶺下風景近炎方地暖生春早
家貧覺歲長石房雲過濕松徑雨餘香日久竟無
事詩書聊自彊

僧處默

題聖果寺云路自中峰上盤廻出薜蘿到江吳地
盡隔岸越山多古木叢青靄遙天浸白波下方城
郭近鐘磬接笙歌

全唐詩話

卷六
廿八

汲古閣

螢云熠熠與娟娟池塘竹樹邊亂飛如拽火成聚
却無烟微雨灑不減輕風吹欲燃昔時書案上頻
把作囊懸

遠烟云靄靄前山上凝光滿薜蘿高風吹不斷遠
樹得偏多翠與晴雲合輕將淑氣和正堪流野目
休問意如何

織婦云蓬鬢蓬門積恨多夜闌燈下不停梭成繅
猶自陪錢納未直青樓一曲歌

僧澹交

病後作云未得身亡法此身終未安病腸猶可洗
骨瘦不禁寒藥少心神餌經無氣力看悠悠片雲
質獨坐夕陽殘

寫真云圖形期自見自見却傷神已是夢中夢更
逢身外身水花凝幻質墨彩聚空塵堪笑余兼爾
俱爲未了人

僧若虛

全唐詩話

卷六
廿九

汲古閣

古鏡云軒后洪爐獨鑄成蘚痕磨落月輪呈萬般
物像皆能鑿一箇人心不可明匣內乍開鸞鳳活
臺前高掛鬼神驚百年肝膽堪將比只怕頻看素
髮生

僧曇域

贈島雲禪師云遠菴枯葉滿群鹿亦相隨頂骨生
新髮庭松長舊枝禪高太白月行出祖師碑亂後
潛來此南人總不知

僧懷浦

初冬旅舍早懷云枕上角聲微離情未息機夢回
三楚寺寒入五更衣月沒棲禽動霜晴凍葉飛自
慙于役早深與道相違

僧慕幽

燈云鐘斷危樓鳥不飛熒熒何處最相宜香燃水
寺僧開卷筆寫春闈客著詩忽爾思多穿壁處偶
然心盡斷纓時孫康勤苦誰留念少減餘光借與

全唐詩話

卷六
三十

及古開

伊

僧尚頽

寄陳陶處士云鍾陵城外住喻似玉沉泥道直貧
嫌殺神清語亦低雪深加酒債春盡減詩題記得
曾遊宿山茶又更攜

開元官人

開元中賜邊軍纊衣製於宮中有兵士於短袍中
得詩曰沙場征戍客寒苦若爲眠戰袍經手作知

落阿誰邊蓄意多添線含情更着綿今生已過也
重結後生緣兵士以詩白帥帥進呈玄宗以詩遍
示宮中曰作者勿隱不汝罪也有一宮人自言萬
死上深憫之遂以嫁得詩者謂曰吾與汝結今生
緣邊人感泣

崔氏

盧校書年暮娶崔氏結褵之後爲詩曰不怨盧郎
年紀大不怨盧郎官職卑自恨妾身生較晚不及

全唐詩話

卷六
三十一

汲古閣

盧郎年少時

劉氏

杜羔不第將至家其妻劉氏先寄詩云良人的的
有奇才何事年年被放回如今妾面羞君面君到
來時近夜來羔卽回尋登第又寄詩云長安此去
無多地鬱鬱蔥蔥佳氣浮良人得意正年少今夜

醉眠何處樓

或云
趙氏

薛媛

濠梁南楚材旅遊陳頴受頴牧之眷無返舊意其
妻薛媛寫真寄之曰欲下丹青筆先拈寶鏡端已
驚顏索寞漸覺鬢凋殘淚眼描將易愁腸寫出難
恐君渾忘却時展畫圖看夫婦遂偕老焉時人嘲
之曰當時婦棄夫今日夫棄婦若不逞丹青空房
應獨守

雲溪友議

李季蘭

寄韓按書云無事烏程縣蹉跎歲月餘不知芸閣

全唐詩話

卷六
三十二

汲古閣

吏寂寞意何如遠水浮仙棹寒星伴使車因過大
雷岸莫忘八分書

季蘭五六歲其父抱於庭蘭作詩詠薔薇云經時
未架却心緒亂縱橫父恚曰此必爲失行婦也後
竟如其言

高仲武云士有百行女有一德季蘭則不然形器
旣雌詩意亦蕩自鮑暉以下罕有其倫如遠水浮
仙棹寒星伴使車此五言之嘉境也上方班婕妤

則不足下比韓英則有餘不以遲暮亦一俊異劉
長卿謂季蘭爲女中詩豪

如意中女子

如意中女子年九歲能吟詩則天試之皆應聲而
就其兄辭去則天令作詩送兄遂賦云別路雲初
起離亭葉正飛所嗟人異鴈不作一行歸

魚玄機

玄機咸通中西京咸宜觀女道士也字幼微善屬

全唐詩話

卷六
三十三

汲古閣

文其詩有綺陌春望遠瑤徽秋興多又殷勤不得
語紅淚一雙流又焚香登玉壇端簡禮金闕又雲
情自鬱爭同夢仙貌長芳又勝花後以笞殺女童
綠翹事下獄獄中有詩云易求無價寶難得有情
夫又云明月照幽隙清風開短襟

僖宗宮人

唐僖宗自內出袍千領賜塞外吏士神策軍馬真
於袍中得金鎖一枚詩一首云玉燭製袍夜金刀

呵手裁鎖寄千里客鎖心終不開真就市貨鎖爲人所告主將得其詩奏聞僖宗令赴闕以宮人妻真後僖宗幸蜀真晝夜不解衣前後捍禦

張建封妓

樂天有和燕子樓詩其序云徐州張尚書亦有愛妓盼盼善歌舞雅多風態爲校書郎時遊淮泗間張尚書宴予酒酣出盼盼以佐歡予因贈詩落句云醉嬌勝不得風嫋牡丹花一歡而去爾後絕不

全唐詩話

卷六
三十四

汲古閣

復知茲一紀矣昨日司勳員外郎張仲素繪之訪余因吟詩有燕子樓詩三首辭甚婉麗詰其由乃盼盼所作也繪之從事武寧軍軍累年頗知盼盼始末云張尚書旣歿彭城有張氏舊第中有小樓名燕子樓盼念舊愛而不嫁居是樓十餘年于今尚在盼盼詩云樓上殘燈伴曉霜獨眠人起合歡牀相思一夜情多少地角天涯不是長又云北邙松栢鎖愁烟燕子樓人思悄然自理劒履歌塵散紅

袖香銷一十年又云適看鴻鴈岳陽迴又覩玄禽
逼社來瑤瑟玉簫無意緒任從蛛網任從灰余嘗
愛其新作乃和之云滿窓明月滿簾霜被冷燈殘
拂臥牀燕子樓中寒月夜秋來祇爲一人長鈿帶
羅衫色似烟幾回欲起卽潜然自從不舞霓裳曲
疊在空箱十二年又今春有客洛陽迴曾到尙書
墓上來見說白楊堪作柱爭教紅粉不成灰又贈
之絕句黃金不惜買蛾眉揀得如花四五枝歌舞
教成心力盡一朝身去不相隨後仲素以余詩示
盼盼乃反覆讀之泣曰自公薨背妾非不能死恐
百載之後以我公重色有從死之妾是玷我公清
範也所以偷生耳乃和白公詩云自守空樓歛恨
眉形同春後牡丹枝舍人不會人深意訝道泉臺
不去隨盼盼得詩後怏怏旬日不食而卒但吟云
兒童不識沖天物謾把青泥汗雪毫出長慶集

女郎宋若照

若照具州人父廷芬生五女皆警慧善屬文長若
莘次若照若倫若憲若荀若照尤高皆性素潔鄙
薰澤靚粧不願歸人欲以學名家家亦不欲與寒
鄉凡喬爲姻對正元中昭義節度使李抱真表其
才德宗詔入禁中試文章并問經史大義帝咨美
悉留宮中帝能詩每與侍臣賡和五人者皆預又
高其風標不以妾侍命之呼學士自正元七年秘
禁圖籍詔若莘總領元和末卒後穆宗拜若照尚

全唐詩話

卷六
三十六

汲古閣

宮嗣其秩歷穆敬文三朝皆呼先生若憲文宗時
以讒死倫荀早卒廷芬男獨愚不可教爲民終身
女郎張窈窕

寄故人云澹澹春風花落時不堪愁望更相思無
金可買長門賦有恨空吟團扇詩

女郎劉媛

學畫蛾眉獨出羣當時人道便承恩經年不見君
玉面花落黃昏空掩門

鶯鶯

鶯鶯姓崔氏有張生者託其婢紅娘以春詞二篇誘之崔答曰待月西廂下迎風戶半開拂牆花影動疑是故人來張喜其意既遇而別崔命琴鼓霓裳羽衣之曲張文戰不利崔貽書以廣其意又有竹茶碾亂絲之贈曰淚痕在竹愁緒縈絲因物達情永以爲好楊巨源元稹善張生見其意歎賞之巨源賦崔娘一篇云清潤潘郎玉不如中庭蕙草

全唐詩話

卷六

三十七

汲古閣

雪銷初風流才子多春思腸斷蕭娘一紙書元稹亦續生會真詩三十韻張後以爲妖於身也絕之既而崔託其所親潛寄一詩云自從消瘦減容光萬轉千回嬾下牀不爲傍人羞不起因郎憔悴却羞郎張將行賦一章以絕之云棄置今何道當時且自親還將舊來意憐取眼前人自是遂絕

不知名

江陵有士子遊交廣五年未還愛姬爲太守所取

納於高麗坊邸及歸寄詩曰陰雲幕幕下陽臺惹
着襄王更不回五度看花空有淚一心如結不曾
開纖蘿自合依芳樹覆水寧思返舊杯惆悵高麗
坊邸宅春光無復下山來守遂遣還有爲御史分
務洛京者其愛姬爲李逢吉一閱遂不復出明日
以詩投之云三山不見海沉沉豈有仙蹤尙可尋
青鳥去時雲路斷嫦娥歸處月宮深紗窻暗想春
相憶書幌誰憐夜獨吟料得此時天上月只應偏
全唐詩話

卷六
三十八

汲古閣

照兩人心李得詩含笑曰大好詩遂絕

唐人及第後或遇舊題名處卽加前字故詩曰曾

題名處添前字送出城人乞舊詩

姚合及第後詩
云新街添一字

舊友讓
前途

長安木塔院有進士房魯題名處有人題

詩曰姚家新婿是房郎未解芳顏意欲狂見說正
調穿羽箭莫教穿破寺家牆丹陽焦山瘞鶴銘小
碣刻詩云江外水不凍今年寒苦遲三山在何處
欲到引風歸後題云丹陽掾王贄作後復題小石

云縱步不知遠夕陽猶未回
好花隨意發流水逐人來
不知誰爲之忽聞天子訪
沉淪萬里懷書西入秦
早知不用無媒客恨別
江南楊柳春

奇鯤南詔大會之心膂也
僖宗時來朝高駢自淮
海飛章曰蠻酋用事惟奇
鯤等數人請止而燬之
帝用其策奇鯤有詞藻途
中詩云風裏浪花吹又
白雨中峰影洗還青
沙鷗聚處窓前見林狝啼時

枕上聽

出瑣言

全唐詩話

卷七六
三十九

汲古閣

雜調云勸君莫惜金縷衣
勸君須惜少年時
有花堪折直須折
莫待無花空折枝

空賜羅衣不賜恩
一薰香後一銷魂
雖然舞袖何曾舞
長對春風裊淚痕

眼想心思夢裏驚
無人知我此時情
不如池上鴛鴦鳥
雙宿雙飛過一生

鶯啼露冷酒初醒
捲畫樓西曉角鳴
翠羽帳中人夢覺
寶釵斜墜枕函聲

兩心不語暗知情燈下裁縫月下行行到堦前知
未睡夜深聞放剪刀聲

乾符末有客訪僧僧却之題門而去云龕龍去東
海時日隱西斜敬文今不在碎石入流沙忽一僧
曰大罵我曹乃合寺苟卒四字

權龍褒

景龍中爲左武衛將軍好賦詩而不知聲律中宗
與學士賦詩輒自預焉帝戲呼爲權學士初以親

全唐詩話

卷六
四十

汲古閣

累遠貶洎歸獻詩云龍褒有何罪天恩放嶺南赦
知無罪過追來與將軍上大笑嘗吟夏日詩嚴霜
白皓皓明月赤團團或曰豈是夏景答曰趨韻而
已通天中刺滄州初到呈同官曰遙看滄州城楊
柳鬱青中央一羣漢聚坐打捩角諸公謝曰公
有逸才曰不敢趨韻而已常作秋日詠懷詩曰簷
前飛七百雪白後園僵飽食房裏側家糞集野蠅
參軍不曉問之權曰鷄子簾前飛直七百洗衫掛

後園白如雪飽食房中側臥家裏便轉集得野澤
蜚蜋聞者笑之始賦夏日嚴霜明月之句乃皇太
子宴賦詩太子援筆譏之龍褒才子秦州人氏明
月晝耀嚴霜夏起如此詩章趣韻而已

龍褒爲瀛州刺史歲暮京中人附書云改年多感
乃將書呈判司以下云有司改年爲多感元年一
日謂府吏何名私忌對曰父母亡日請假偶房中
靜坐有青狗突入大怒曰衝破我忌日更謀改到
全唐詩話

卷六
四十一

汲古閣

明日好作忌日談者笑之

余刻梁記室叅軍詩品三卷上下漢魏六
朝無媿鼎、矣惜有唐諸大家未有能彙
而評之者偶簡遂初主人全唐詩話約三
百餘家雖片羽點斑于三百年風會不能
無憾然而三變梗槩已具矣更選宋人
詩話之最者十冊附存卷末庶幾稽古饜
奇之士採而錄焉或亦秘函之一種云湖

南毛晉識

全唐詩話

卷十六
四十二

汲古閣

全唐詩話卷之六

